

四庫全書

史部

欽定四庫全書

史部

經義考卷十三

詳校官編修_臣李克棟

編修_臣程嘉謨覆勘

總校官知縣_臣繆琪

校對官編修_臣秦泉

謄錄監生_臣顧光晉

欽定四庫全書

經義考卷十

翰林院檢討朱彝尊撰

易九

王氏朗易傳

佚

魏志王朗字景興東海郡人魏國初建以軍祭酒領
魏郡太守遷御史大夫改司空進封蘭陵侯諡曰成

著易春秋孝經周官傳咸傳於世正始五年十二月詔故司徒王朗所作易傳令學者得以課試

魏畧朗本名嚴後改爲朗

董氏

遇

周易註

釋文序錄
作章句

七錄十卷

佚

魏畧遇字季直建安初舉郡孝廉稍遷黃門侍郎黃初中出爲郡守明帝時入爲侍中大司農遇善左氏

傳更爲作朱墨別異人有從學者遇不肯教而云必
當先讀百遍言讀書百遍而義自見從學者云苦渴
無日遇言當以三餘或問三餘之義遇言冬者歲之
餘夜者日之餘陰雨者時之餘也由是諸生少從遇
學無傳其朱墨者

魏志明帝時大司農弘農董遇歷注經傳頗傳於世
陸德明曰遇弘農華陰人

朱震曰天地之數五十有五董遇謂其六以象六畫

之數減卦之六畫爲四十九不知五十有五天地之極數大衍之數五十其一太極不動而四十九運而爲八卦重而六十四若去六畫即說不通

按董氏易注君子體仁作體信與京氏荀氏同裒多益寡裒作桴與鄭氏荀氏同洗心退藏于密洗作先與京氏荀氏虞氏張氏同夫坤隤然示人簡矣隤作妥與陸氏姚氏同餘如拔茅茹以其彙征彙作夤貴如皤如皤作

樂君子得輿作德車婦喪其茀作筭爲乾卦

作幹卦與諸家別

劉氏分易注

佚

管輅別傳故郡將劉邵字令先清和有思理好易而
不能精與輅相見自說注易將訖輅言今明府欲勞
不世之神經緯大道誠富美之秋然輅以爲注易之
急急於水火水火之難登時之驗易之清濁延於萬

代不可不先定其神而後垂明思也自旦至今聽探
聖論未有易之一分易安可注也邠因易繫辭諸篇
之理以爲注不得其要輅尋聲下難事皆窮柝曰夫
乾坤者易之祖宗變化之根源今明府論清濁者有
疑疑則無神恐非注易之符也邠言數與何平叔論
易及老莊之道至於精神遐流與化周旋清若金水
鬱若山林非君侶也

管氏輅
周易通靈決

隋志五行家二卷

佚

周易通靈要決

隋志五行家一卷

佚

周易林

唐志五行家四卷

佚

隋書魏少府丞管輅撰

趙汝楨曰梁丘賀以占筮顯名漢宣時費直長於卦
筮高相專說災異其後虞翻闕子明之徒尤注意於
占至管輅雖分筮八卦乃絕口不及易中辭義矣

胡一桂曰公明精於卦筮窮極幽微占言吉凶禍福
無毫髮爽雜以射覆說相一皆神妙

郝敬曰管輅分著占象援引易理自謂得其源遂涉
其流然此實一人一家之學其於民義物則至德要

道無與焉聖人所謂隱怪弗爲者也

鍾氏

會

周易无互體論

七錄十卷

佚

周易盡神論

隋志一卷

佚

魏志鍾會字士季潁川長社人太傅繇小子也爲司

徒初會弱冠與山陽王弼並知名會嘗論易无互體
孫盛曰荀顗嘗難會易无互體見稱於世

王氏

補

周易注

隋志十卷

佚

周易音

佚

魏志肅字子雍年十八從宋忠讀太玄而更爲之解

黃初中爲散騎黃門侍郎後以常侍領秘書監兼崇文館祭酒出爲廣平太守徵還拜議郎頃之爲侍中遷太常後遷中領軍加散騎常侍肅善賈馬之學而不好鄭氏米會同異爲尚書詩論語三禮左傳解及撰定父朗所作易傳皆列於學官

李延壽曰鄭玄易大行於河北王肅易亦間行焉

陸德明曰子邕東海蘭陵人魏衛將軍太常蘭陵景侯又注尚書禮喪服論語孔子家語述毛詩注作聖

證論以難鄭玄 又曰爲易音者三人王肅李軌徐

邈

王應麟曰王肅注易十卷今不傳釋文云自繫辭訖
於雜卦肅本皆有傳字漢儒林傳云孔子晚而好易
讀之韋編三絕而爲之傳肅本是也其注噬乾肺得
金矢曰四體離陰卦骨之象骨在乾肉脯之象金矢
所以獲野禽故食之反得金矢君子於味必思其毒
於利必備其難見太平御覽

胡一桂曰王肅撰定其父成侯朗所作易傳列於學官本義所引有曰王肅本者是也 又曰王肅注周易十卷崇文總目乃十一卷題王肅傳云後人算陸德明釋文所取者附益之非肅本書

按王氏易注易音皆不傳見於釋文所引者六爻發揮作輝其惟聖人乎作愚人後結始作聖人即鹿作麓雲上於天作雲在天上致寇至寇作戎犖帶作槃帶承天寵也寵作龍

比之匪人作匪人凶天下隨時作之隨時之
義作隨之時義君子以嚮晦入宴息嚮作鄉
君子以振民育德育作毓有子考无咎以考
絕句盟而不薦作觀薦王用出征以正邦也
下更有獲匪其醜大有功也八字有戾愆也
愆作斃羸其角羸作縲不詳也詳作祥失得
勿恤作得失勿恤夷于左股作般其人天且
劓作斃中行告公用圭作用桓圭后以施命

誥四方誥作詰繫于金柅作柅來徐徐作余
余剝則作斲旣女歸吉也作女歸吉利貞君
子以居賢德善俗作善風俗天際翔也翔作
祥乾知大始大作泰而成位乎其中矣而下
有易字範圍天地之化作犯違開物成務開
作闡洛出書作雒何以守位曰人人作仁妙
萬物而爲言妙作眇爲臭作爲香臭蠱則飭
也飭作節自繫辭上訖於雜卦皆有傳字與

諸家多不同

王氏

弼

周易注

隋志六卷

七志
十卷

存

魏志弼好論儒道辭才逸辨注易及老子爲尚書郎
年二十餘卒

何劭曰弼注易往往有高麗言太原王濟好談易老
莊常云見弼易注所悟者多然弼爲人淺而不識物

情

孫盛曰易之爲書窮神知化非天下之至精其孰能與於此世之注解殆皆妄也况弼以附會之辨而欲籠統玄旨者乎故其序浮義則麗辭溢目造陰陽則妙蹟無聞至於六爻變化羣衆所效日時歲月五氣相推弼皆擯落多所不闕雖有可觀者焉恐將泥夫

大道

王儉曰易體微遠實貫羣籍施孟異聞周韓殊旨豈

可專據小王便爲該脩

李延壽曰河南即青齊之間儒生多誨王輔嗣所注
師訓益寡

孔穎達曰傳易者西都則有丁孟京田東都則有荀
劉馬鄭大體更相祖述非有絕倫惟魏世王輔嗣之
注獨冠古今所以江左名儒並傳其學河北學者罕
能及之

陸德明曰弼字輔嗣山陽高平人魏尚書郎年二十

四卒注易上下經六卷作易畧例一卷

石介曰王弼多取康成舊解爲之訓說今之易蓋出於費說也

李石曰王弼注易刻木偶爲鄭玄像見其所誤輒呼叱之

冊府元龜顧悅之難王弼易義四十餘條京口閔康之申王難顧遠有情理

宋祁曰王弼著易直發胸臆不知鄭康成等師承有

自

陳臯曰易本上下二篇王弼注釋之時以孔子十翼文相錯因離爲六篇謂之乾傳泰傳夫既稱經又何以名傳案鄭康成本並無乾傳泰傳字蓋輔嗣加之也

代淵曰彖與大小象諸卦本同乾卦例皆於六爻後相繼而列之聚爲一處至鄭康成王弼注時謂彖與大衆本論卦體故列六爻前小象以釋爻故各退在

逐爻後使人易曉唯留乾之一卦不移

金君卿曰弼出於馬鄭馬鄭出於費氏

程伯子曰王弼注易玄不見道但却以老莊之意解說而已

司馬光曰輔嗣好以老莊解易恐非易之本旨其以雷動風行運變萬化爲非天之心然則爲此者果誰邪

張子曰以老氏以有無論易自王弼始

晁說之曰易雜老莊而專明人事則自王弼始弼好
老魏晉談玄皆弼輩倡之使當暴秦之時則易豈能
以卜筮免乎

郭雍曰漢興諸儒僅能訓詁舉大義或復歸於陰陽
家流大失聖人言易之旨正始中王輔嗣一切草去
易以高尚之言然輔嗣祖述虛無其辭雖美而無用
於天下國家於是易爲空言矣又非三聖人所謂易
之道也

邵博曰孔穎達謂王輔嗣之意象本釋經宜相附近
分爻之象各附當卦蓋古易既亂於費氏又亂於王
氏也

李綱曰弼有得意在忘象得象在忘言之論深斥象
數之學謂互體不足遂及卦變變又不足推至五行
義無所取而近世學者遂廢象而不談失聖人之意
多矣

朱震曰弼去舊說雜以老莊之言於是儒者專尚文

辭不復推大傳天人之道自是分裂不合

王炎曰焦延壽京房孟喜之徒遁入於小數曲學無足深誚而鄭玄虞翻之流穿鑿附會象既支離理滋晦蝕王弼承其後遽棄象不論後人樂其說之簡且便也故漢儒之學盡廢而弼之注釋獨存於今

吳仁傑曰王弼易用康成本謂孔子贊易之辭本以釋經宜相附近乃各附當爻每爻加象曰以別之謂之小象又移文言附於乾坤二卦加文言曰三字於

首而以繫辭上下傳字施之說卦前後二篇分上經
乾傳第一泰傳第二噬嗑傳第三下經咸傳第四夬
傳第五豐傳第六而無卷字

朱子曰王弼周易巧而不明 又曰古易彖象文言
各在一處至弼始合爲一後世諸儒遂不敢與移動
陳振孫曰自漢以來言易者多溺於占象之學至弼
始一切掃去暢以義理於是天下宗之餘家盡廢然
弼好老氏魏晉談玄自弼輩倡之易有聖人之道四

焉去三存一於道闕矣況其所謂辭者又雜異端之說乎范甯謂其罪深於桀紂誠有以也

章如愚曰三易同祖伏羲而文王之易獨以理傳五家同傳周易而費氏之學獨以理傳馬王諸儒同釋易之學而王弼之注獨以理傳然則明易之要在理而已矣

趙汝楨曰西漢之末向長范升諸人好談老易東都則折象魏則何晏王弼裴徽皆以玄說易後至杜弼

王希旦王績武攸緒輩皆好之開元初詔張說舉通
易老莊者則易儕於老莊矣

杭汝權曰易經義文周孔之手可謂最古而篇第不
明蓋漢魏以來諸儒之臯而王韓尤其著者魏志謂
鄭康成始合彖象於經厥初猶如今乾卦附之於後
至王弼則自坤以下各爻聯綴之標題乃以上經乾
傳至下經豐傳爲六卷已不知於義何居及康伯又
以上下繫爲七八卷說序雜爲第九卷畧例爲第十

卷使義文周公上下二篇之經不成二篇而孔子十翼不成十翼漢魏迄今幾千餘年列於學官專置博士無一人能辨其非者惑世誣民抑何甚哉

劉克莊曰京房費直諸人皆舍章句而談陰陽災異往往揆之前聖而不合推之當世而少驗至王輔嗣出始研尋經旨一掃漢學然其弊流而爲玄虛矣

王應麟曰程子謂學易先看王弼蓋輔嗣之注學者不可忽也其以寂然至无爲復又云冬至陰之復夏

至陽之復蘓子美辨其非愚謂先儒云至靜之中有動之端所以見天地之心與寂然至無之說異矣

黃震曰易聖人之書也所以明斯道之變易無往不在也王弼間以老莊虛無之說叅之誤矣

丁易東曰漢去古未遠諸儒皆以象變言易矣言象變而遺理不可也王輔嗣一掃而去之以其遺理而去之可也并象變而去之則後之學者不知三聖命辭之本心矣

俞琰曰易初九潛龍勿用此爻辭也文王之所作也
潛龍勿用陽在下也此爻傳也孔子之所述也古易
爻傳自爲一篇不以附經自費氏以此解經而鄭康
成傳費氏之學始移附各卦經文之後猶未若王弼
以之分附於諸爻之下也弼更以象爻置於爻辭之
前又於象辭之首并爻傳之首皆冠以象曰二字於
是後人以象辭爲大象爻辭爲小象象安有所謂大
小哉又曰文王之辭謂之經孔子之辭謂之傳傳

者所以釋經之辭也經有彖傳即文王所繫於卦下之辭孔子釋文王卦下之辭而傳述其意故謂之彖傳古者經與傳各爲一書自費直以傳解注而後鄭康成以彖傳連經文然猶若今乾卦次序至王弼乃自坤卦而始每卦以彖傳移綴於彖辭之後又加以彖曰二字冠之後之人遂不謂之彖傳而直謂之彖夫以孔子之彖傳爲彖則文王之彖辭當復謂之何哉學者惟弼是從竟莫敢移動呂汲公王原叔晁以

道李弼巖呂東萊朱紫陽皆以分經合傳非古吳仁傑稅汝權編周易古經亦皆極論弼之失讀易者要當審其是不可紐以舊說而以彖傳爲彖也

吳源曰五經惟易最古至費氏而古易遂變爲今至鄭康成王弼而今易不可復古噫使天下後世不知聖人作易繫易之蘊皆漢晉諸儒之過也

王禕曰弼注高談理致以老莊之意爲解

何喬新曰王弼之傳祖尚清虛

楊時喬曰魏晉間王弼說行依易談玄虛名雖爲易
聖人卜筮尚占理象數皆失之矣

郝敬曰魏漢以還學者迷習訓詁獨王輔嗣超然窺
十翼之藩而說者謂其於象太踈 又曰易者象而
已矣而弼曰得意在忘象弼懲漢魏諸家之附會矯
枉過直毀繩墨而尚清言習氣使然不可以爲訓也
黃宗羲曰王輔嗣注易得意忘象得象忘言日時歲
月五氣相推悉皆擯落顧論者謂其以老莊解易試

讀其注簡當而無浮氣何曾籠絡玄言故能遠歷於唐發爲正義其廓清之功不可泯也

黃宗炎曰易以卜筮獨不羅秦火其民間自相授受亦止言卜筮而不敢及乎理義故漢儒易學大抵皆論災祥禍福以象數爲重蓋其由來使然也然其章句之沿習與訓詁之垂傳者固未嘗廢也乃宋人竟詆之謂秦火焚書而書存漢儒窮經而經絕豈其然哉輔嗣生當漢後見象占之牽強拘泥有乖於聖教

始一切掃除暢以義理天下之耳目煥然一新聖道
爲之復覩唐太宗詔長孫無忌與諸儒判定義疏十
餘家凡辭尚虛誕者皆所不取惟王注獨冠古今亦
其學其辭有足以折服羣賢豈徒以當時習尚而漫
爲回護之者哉乃宋儒竟詆之謂崇尚虛無襍述異
端曲說晉魏談玄自王倡始至神州陸沉中原魚爛
皆輔嗣所肇甚或擬其罪爲桀紂噫亦太過矣夫談
象數則斥之如彼詮辭理則咎之如此爲宋以前之

儒者不亦難乎

陳廷敬曰費直以彖象釋經附於卦後今乾卦大哉
乾元至用九天德不可爲首是其例也雖其初加一
傳字以別於經然十二篇之經直已亂之矣至鄭康
成注易合彖象於經而所謂彖象不連經文者猶在
至王弼注易用康成本又增入乾坤文言雖加彖曰
象曰文言曰以別於經然直之所旣亂者弼又從而
亂之若說卦等篇仍其舊總曰繫辭自是宋儒知有

弼易而不知有古經矣

周易畧例

隋志一卷

新舊唐書合周易注作七卷

存

邢璣曰略例者舉釋綱目之名統明文理之稱略不具也例舉並也輔嗣以先儒注二十餘家雖小有異同而迭相襍述推比所見特殊故作略例以辨諸家之惑錯綜文理略錄之也

項德棻曰王輔嗣周易略例明象辨位二篇淵乎邃也邢氏稱其總一部之指歸明六爻之得失可以經天緯地探測鬼神推辟咎悔自博士宗宋而此書塵土矣

沈玠曰輔嗣明卦明爻諸篇舉義明微不特掃象占之溺亦出漢經師訓之上

周易窮微論

通志一卷

佚

國史志王弼論一卷大類略例而不及

易辨

中興書目一卷

佚

陳振孫曰世稱王輔嗣凡爲論五篇館閣書目王弼
易辨一卷論象論象亦頗略例意即此書又言此書
已亡至晉得之王羲之承詔錄藏於祕府世莫得見

未知何據

何氏

晏

周易私記

二十卷

佚

周易講說

十三卷

佚

冊府元龜何晏撰周易私記二十卷周易講說十三

卷

孫氏炎周易例

佚

魏志樂安孫叔然授學鄭玄之門人稱東州大儒懲
爲秘書監不就作周易春秋例毛詩禮記春秋三傳
國語爾雅諸注

裴松之曰叔然與晉武帝同名故志稱其字

荀氏輝周易注

七錄十卷

佚

荀氏家傳輝字景文

又云字長倩

太子中庶子與賈克共

定晉律又作易集解

魏志輝官至虎賁中郎將

阮氏

籍

通易論

宋志一卷

存

魏志籍才藻豔逸而倜儻放蕩行已寡欲以莊周爲模則官至步兵校尉

胡一桂曰阮嗣宗易通論一卷凡五篇

嵇氏康周易言不盡意論

一篇

佚

晉書嵇康字叔夜譙國銍人拜中散大夫

虞氏翻周易注

隋志九卷

釋文序
錄十卷

闕

吳志虞翻字仲翔會稽餘姚人嘗與少府孔融書并
示以所著易注融答書曰易自商瞿以來舛錯多矣
去聖彌遠衆說騁辭曩聞延陵之禮樂近覩吾子之
治易乃知東南之美非徒會稽之竹箭也孫權以爲
騎都尉數犯顏諫爭權不能悅又性不協俗多見謗
毀坐徙丹陽涇縣權積怒非一遂徙翻交州雖處罪

放而講學不倦門徒嘗數百人又爲論語國語訓注
皆傳於世

別傳曰翻初立易注奏上曰臣高祖父故零陵太守
光少治孟氏易曾祖父故平輿令成纘述其業至臣
祖父鳳爲之最密臣先考故日南太守歆受本於鳳
最有舊書世傳其業至臣五世臣生遇世亂長於軍
旅習經於枹鼓之間講論於戎馬之上蒙先師之說
依經立注又臣郡吏陳桃夢臣與道士相遇放髮披

鹿裘布易六爻撓其三以飲臣臣乞盡吞之道士言
易道在天三爻足矣豈臣受命應當知經所覽諸家
解不離流俗義有不當實輒悉改定以就其正

宋咸曰先儒如虞翻崔憬輩之用互體京房郎顗輩
之用五行皆去聖人遠矣

張根曰三代之書或曰連山或曰歸藏或曰周易而
易之名莫之或改豈非變通之義不可易與此八卦
所以爲易之本而三代同之也虞翻好易遇飲三之

夢而不得其說猥曰易道在天三爻足矣豈真知易者哉

朱震曰虞氏論象太密則失之於牽合牽合之弊或至於無說

王應麟曰虞翻注說卦云乾坤五貴三賤故定位艮兌同氣相求故通氣震巽同聲相應故相薄坎戊離己月三十日一會於壬故不相符坤消從午至亥故順乾息從子至巳故逆蓋用納甲卦氣之說

易律厯

隋志五行家一卷

佚

陳振孫曰虞翻注京氏叅同契律厯志一卷專言占象而不可盡通字亦多誤未有別本校

王弘撰曰納甲之說京氏易傳魏氏叅同契皆有之而虞氏之說較備

周易集林

隋志五行家一卷

佚

周易日月變例

七錄六卷

佚

隋志注周易日月變例六卷虞翻陸績撰

按虞氏世治孟氏易然釋文所引其文或不
盡依孟氏若陰凝于陽爲其噤于无陽也則

同荀氏本纍其角得失勿恤治容作野則同
鄭氏本萃亨无亨字則同馬氏鄭氏本易以
工則同京氏本先心則依京氏荀氏本餘若
匪其彭作廷明辨皙也作析朋盍簪作戩咸
其輔作輔滕口說也滕作滕已事徼往已作
紀剛揜也作弇坤作成物作坤化繫辭焉而
明吉凶下有悔吝二字剛柔者晝夜之象作
晝夜者剛柔之象也易之序也作象所樂而

玩者作所變樂天知命作變天慢藏誨盜治
容誨淫作悔天地之文作文爲龍爲駝爲科
上槁科作折謙輕而豫怠也怠作怡此與諸
家不同易注凡九卷雖不傳而李氏集解撫
采獨詳錄之尚可得二三卷其大畧尚存也

陸氏

續

周易注

釋文序錄
注作述

隋志十五卷

釋文序錄新舊唐書
志十三卷會通一卷

佚

鹽邑志林
載有一卷

注京氏易

三卷

存

吳志陸績字公紀吳郡吳人爲鬱林太守加偏將軍
雖有軍事著述不廢作渾天圖注易釋玄皆傳於世
朱震曰陸績之學始論動爻

按陸氏易注已亡今鹽邑志林載有一卷乃
係抄撮陸氏釋文李氏集解二書爲之所存

者幾希矣其經文異諸家者履帝位而不疚
作疾明辨皙也皙作逝納約自牖作誘喪羊
于易作場婦子嘻嘻作喜喜君子以懲忿窒
欲作療欲吾與爾靡之作緝之三年克之慝
也作備也曹侍郎秋嶽曾見藏書家有存三
卷者惜侍郎沒無從訪求矣

程氏東周易摘

佚

吳志程秉字德樞汝南南頓人逮事鄭玄後避亂交
州與劉熙考論大義遂博通五經權聞其名徵拜太
子太傅著周易摘尚書駁論語弼凡三萬餘言

姚氏信周易注

隋志十卷七錄十
二卷

佚

阮孝緒曰姚信字元直吳興人吳太常卿

陸德明曰信字德祐

按阮氏七錄有姚信集二卷又嘗著士緯十
卷吳志陸績傳注有表請賜績女鬱生以義
姑之號又陸遜傳姚信以親附太子枉見流
徙又孫和傳寶鼎二年十二月遣守丞相孟
仁太常姚信等備官僚中軍步騎二十人以
靈輿法駕東迎神於明陵又晉書范平傳平
研覽墳索遍該百氏姚信賀部之徒皆從受
業又南史姚察傳讓選部書曰臣九世祖信

名高往代

云

今易注已亡見於釋文者盱

豫作盱云日始出引詩盱日始旦夷于左股

作右桡君子以順德作得折其右肱作股聞

其无人作閼日月運行作違行言語以爲階

作機貞勝者也作貞稱爲弓輪作倫爲羸作

蠱

尚氏

廣

周易雜占

隋志五行家九卷

唐志
八卷

佚

翟氏

玄

易義

九家易有
翟子元

佚

陸德明曰子元不詳何人爲易義

按翟氏易義先張之弼後說之弼弼亦作壺
惕號作錫號云賜也來徐徐作荼荼云內不
定之意正位凝命作擬命云度也

張氏易義

佚

按張氏易見九家易注不詳其名陸氏釋文
載有張倫本直方大上有易曰二字合車而
徒車作輿寘于叢棘寘作置振恒作震恒羸
其角羸作縈婦子嘻嘻作嬉嬉往蹇來譽宜
待也待作時範圍天地作犯違云猶裁成
也未審即其人否考之序錄又未列其姓氏
不敢臆定也

朱氏易義

佚

陸德明曰荀爽等九家集注注內又有張氏朱氏並不詳何人

按李鼎祚集解引諸家易中有朱仲之疑即其人也

楊氏周易集二王注

隋志五卷

佚

周易馬鄭二王四家集解

隋志十卷

佚

經義考卷十

欽定四庫全書

經義考卷十一

翰林院檢討朱彝尊撰

易十

裴氏秀易論

佚

文章叙錄秀字季彥年二十五為黃門侍郎累遷散
騎常侍尚書僕射令光祿大夫咸熙中封廣川侯晉

室受禪進左光祿大夫改封鉅鹿公遷司空著易及樂論又畫地圖十八篇傳行於世

衛氏攸攸義

攸

晉書衛瓘字伯玉河東安邑人太康初司空侍中尚書令惠帝即位加太保錄尚書事

王氏宏易義

攸

晉書王宏字正中高平人祭從孫秦始初為汲郡太守遷衛尉河南尹大司農太康中為司隸校尉後為尚書

陸德明曰宏弼之兄晉大司農贈太常為易義

鄒氏湛周易統畧

隋志五卷

新舊唐志統畧論三卷

佚

晉書鄒湛字潤甫南陽新野人仕魏歷通事郎太學

博士太康中為散騎常侍國子祭酒轉少府

劉氏兆周易訓注

佚

晉書劉兆字延世濟南東平人武帝時五辟公府三徵博士皆不就撰周易訓注以正動二體互通其文

向氏秀周易義

佚

晉書向秀字子期河內懷人為散騎侍郎轉黃門侍

郎散騎常侍

按向氏易文王以之依鄭氏荀氏本作似

阮氏咸周易難答論

唐志二卷

佚

晉書咸字仲容歷仕散騎侍郎出補始平太守

唐書阮長成阮仲容難答

應氏貞明易論

唐志一卷

佚

晉書應貞字吉甫汝南南頓人魏侍中璩之子武帝初置太子中庶子官以貞為之後遷散騎常侍

王氏濟周易義

佚

晉書王濟字武子善易尚長山公主起家拜中書郎累遷侍中出為河南尹尋使白衣領太僕

皇甫氏謚易解

佚

晉書皇甫謐字士安安定朝郡人有高尚之志以著述為務號玄晏先生

胡一桂曰見正義

阮氏渾周易論釋文序錄
論作義

隋志二卷

佚

陸德明曰阮渾字長成籍之子晉太子中庶子馮翊太守為易義

袁氏準周易傳

佚

袁氏世紀準字孝尼著書十餘萬言為周易周官傳及論五經滯義聖人之微言以傳於世

荀綽曰準有雋才泰始中為給事中

庾氏運易義

佚

陸德明曰庾運字玄度新野人官至尚書為易義

郭氏琦注京氏易

一百卷

佚

冊府元龜郭琦字公偉為著作佐郎注穀梁春秋京氏易百卷鄉人王游等皆就琦學

徐氏苗周易筮占

七錄五行家二十四卷

佚

晉書徐苗字叔胄高密淳于人與弟賈就博士濟南
宋鈞受業遂為儒宗作五經同異評郡察孝廉州辟
從事治中別駕舉異行公府五辟博士再徵並不就

樂氏肇周易象論

隋志三卷

唐志一卷

佚

陸德明曰肇字太初泰山人晉太保掾尚書郎為易
論

李氏克周易音

六篇

佚

晉書李克字弘度江夏人辟丞相王導掾轉記室叅
軍累遷中書侍郎注尚書及周易音六篇行於世

王氏虞周易注

隋志三卷

殘闕七錄十卷釋文序錄十二卷

佚

晉書王廙字世將丞相導從弟為荊州刺史徵為輔國將軍加散騎常侍進左衛將軍

按王氏易注明辨皙也皙作晰利用侵伐作寢伐繡有衣衲繡作襦見釋文又其注云駸馬能食虎豹取其至健也正義引之又艮為徑注云物始改為徑路又震為大塗注云大

塗萬物所生太平御覽引之

楊氏又周易卦序論

隋志一卷

新舊唐志同

佚

陸德明曰又字元舒汝南人晉司徒左長史

王應麟曰御覽嘗引之

按徐堅初學記引又易卦序論云險而止山也險而動泉也動靜皆蒙險故曰山

郭氏

璞

周易洞林

隋志五行家三卷

宋志一卷

佚

周易新林

隋志五行家九卷

又四卷

佚

周易林

七錄五行家六卷

佚

易立成林

隋志五行家二卷

佚

周易玄義經

宋志一卷

佚

易斗圖

隋志五行家一卷

佚

易八卦命錄斗內圖

隋志五行家一卷

佚

晉書郭璞字景純河東聞喜人博學有高才而訥於
言論好古文奇字妙於陰陽算歷有郭公者客居河
東精於卜筮璞從之受業公以青囊中書九卷與之

由是遂洞五行天文卜筮之術為著作佐郎遷尚書
郎嬰王敦之禍璞撰前後筮驗六十餘事名為洞林
又抄京費諸家要撮更撰新林十篇卜韻一篇注釋
爾雅別為音義圖譜又注三蒼方言穆天子傳山海
經及楚辭子虛上林賦數十萬言皆傳於世

王廙曰璞之文筮雖京房管輅不過也

胡一桂曰景純得青囊書遂洞五行天文卜筮之術
嘗撰前後筮驗六十餘事名為洞林斷法用青龍朱

雀幻陳騰蛇白虎玄武六神及太歲諸煞神時日旺相等推算靈驗無比又抄京費諸家撮要更撰新林十篇卜韻一篇大抵只用卦爻不假文字然雜以說相莖法行符壓勝之術往往流於技藝而易道日以支離卑下矣

按郭氏洞林初學記嘗引之雙湖胡氏撰啟蒙翼傳云世罕有其書從王楚翁才古抄得之則元時此書尚存也洞林之文有三言者

如簪非簪釵非釵有四言者如同人之草曰
朱雀西飛白虎東起姦猾銜璧敵人束手占
行得此是謂无咎隨之升曰虎在山右馬過
其左駭為功曹猾為主者垂耳而潛不敢來
下爻升虛邑遂釋魏野豫之小過曰五月晦
日羣魚來入州城寺舍既濟曰小狐汔濟垂
尾累哀初雖偷安終靡所依案卦言之秋吉
春悲又有七言者如否曰乾坤閉塞道消長

虎刑挾鬼法凶亂亂則何時時建寅僵尸交
林血流漂此占行者入塗炭小過之坤曰小
過之坤卦不奇雖有卦氣變陽離初見勾陳
被牽羈暫過則可羈不宜將見劫追事幾危
賴有龍德終無疵遯之姤曰卦象出墓氣家
囚變身見絕鬼潛遊爻墓克刑鬼煞俱卜病
得此歸蒿丘誰能救之坤上牛若依子色吉
之尤賁之豫曰時陰在初卦失度殺陰為刑

鬼入墓建未之月難得度消息卦爻為扶助
馮馬之師乃寡嫗自然奇救宜餐兔子若恤
之得守故豫之解曰有金之象無火形變見
夜光連月精潛龍在中不游行案卦卜之藻
盤鳴金爻所憑无咎慶驗其占法靡不奇中
所謂林者自為韻語占決之辭猶存左氏傳
遺意

葛氏洪周易雜占

七錄五行家十卷

佚

晉書葛洪字稚川丹陽句容人元帝為丞相辟為掾
以平賊功賜爵關內侯咸和初轉司徒掾遷諮議參
軍于寶薦洪才堪國史選為散騎常侍領大著作洪
辭不就聞交趾出丹砂求為勾漏令止羅浮山煉丹
積年著述不輟

孫氏盛易象妙于見形論

一篇

佚

晉書劉惔傳時孫盛作易象妙于見形論簡文帝使
殷浩難之不能屈惔與抗答辭甚簡至盛理遂屈

本傳孫盛字安國太原中都人桓溫留為叅軍從入
關平洛以功封吳昌縣侯出補長沙太守累遷秘書
監加給事中時殷浩擅名一時與抗論者惟盛而已
盛著易象妙于見形論浩等竟無以難之

袁氏宏周易畧譜

舊唐書志一卷

新唐書同

佚

晉書袁宏字彥伯謝尚為安西將軍引宏叅軍事尋遷大司馬桓溫府記室自吏部郎出為東陽郡

宣氏舒通易象論

陸氏經典序錄作通知來藏往論

唐志一卷

佚

陸德明曰舒字幼驥陳郡人晉宜城令為通知來藏
往論

張氏輝
易義

佚

陸德明曰輝字義克梁國人晉侍中平陵亭侯為易
義

杜氏育
易義

佚

陸德明曰育字方叔襄城人晉國子祭酒為易義

楊氏瓚易義

佚

陸德明曰瓚不知何許人晉司徒右長史為易義

邢氏融易義

佚

裴氏藻易義

佚

許氏適易義

佚

楊氏藻易義

佚

陸德明曰邢融裴藻許適楊藻四人不詳何人並為

易義

張氏軌易義

佚

崔鴻曰軌字士彥安定烏氏人漢常山王耳十七世
孫涼州刺史謚武穆

按涼武公易得其資斧資作齊云齊斧黃鉞

斧也

張氏璠周易集解

七志十卷

隋志八卷殘缺新舊
唐書志仍云十卷

佚

畧論

一卷

佚

陸德明曰璠安定人東晉秘書郎參著作集解十二
卷集鍾會向秀庾運應貞荀煇張輝王宏阮咸阮渾
揚又王濟衛瓘樂肇鄒湛杜育楊瓚張軌宣舒邢融
裴藻許適楊藻二十二家序云依向秀本

七錄云集
二十八家

按璠嘗撰後漢紀三十卷所為易注有云險
而止山也險而動泉也太平御覽引之

千氏寶周易注

隋志十卷

佚

今止存一卷
志林載之
鹽

周易宗塗

七錄四卷

佚

周易爻義

隋志一卷

佚

周易問難

二卷

佚

周易玄品

二卷

佚

晉書干寶字令升新蔡人為著作郎平杜弢有功賜

爵關內侯領國史補山陰令遷始安太守王導請為
司徒右長史遷散騎常侍為春秋左氏義外傳注周
易周官凡數十篇

冊府元龜千寶為散騎常侍領著作撰周易問難二
卷周易玄品二卷周易文義一卷

中興書目寶之易學以卦爻配月或配日時傳諸人
事以前世已然之迹證之訓義頗有據

胡一桂曰千寶周易傳十卷復別出文義一卷宣和

四年蔡攸上其書曰其學以卦爻配月或以配日時
傳諸人事而以前世已然之迹證之訓義頗有所據
若大有九三本左傳訓晏享乃與古合房審權亦採
錄之

屠曾序曰吾師草廬先生謂易為五經冠而吳晉英
舊以易解聞吾鹽得兩君子為陸鬱林公紀于常侍
令升第于氏易有註者僅三十卦卦惟乾備六爻餘
止一象一爻而已要皆自古易類萃中摘抄然亦義

文象數幸行一脈於蛟潭海澨間不可謂東南易髓
不自令升標揭之也况駿心雄理遣詞英上不遜輔
嗣錄之不啻起晉儒而清言也乎

項臯謨跋曰嘗覽羣經千子十卷于令升寶周易注
十卷周易宗塗四卷爻義一卷問難二卷玄品二卷
有其名亡其書及從里中太史氏後借讀文淵閣書
目易類一百十種晉以上惟存京君明傳鄭康成注
王輔嗣畧例并注而子夏傳唐張素履偽作不覩有

于氏易略見李鼎祚易傳集解中海鹽樊侯博綜墳
典專精謨述錄示于常侍易解似於載籍節比句櫛
者絕無僅有希世奇書也令升新蔡人徙吳郡海鹽
仕吳為著作郎賜爵關內侯入晉領國史為散騎常
侍補山陰令遷始安太守所著晉紀總論搜神記具
在志林必悉之凌稚哲萬姓統譜于于二姓俱收令
升于氏宗干犍于氏宗于定國干裔有居海鹽有居
嘉善以搏埴為業干窑鎮由是得名是干非于無疑

按隋志周易玄品二卷不著撰人姓名當即
干氏之書又有王氏周易問難二卷疑譌干
為王也其文水洊至洊作薦井牧勿幕勿作
罔豐其沛作韋云祭祀之蔽膝為科上槁作
煇干氏易已無傳惟散見於陸氏釋文李氏
集解近海鹽胡氏編鹽邑志林乃抄撮其僅
存刊行之

殷氏

融

象不盡意論

一篇

佚

按南史殷景仁傳云陳郡長平人曾祖融晉太常隋志有晉太常卿殷融集十卷

黃氏頴周易注

隋志四卷

七錄唐志十卷

佚

隋志晉儒林從事黃頴注今殘缺

陸德明曰南海人晉廣州儒林從事

按黃氏易賁于丘園作世豚魚作遯魚

宋氏公周易論

隋志一卷

佚

隋志晉荊州刺史宋岱撰

徐氏邈周易音

隋志一卷

佚

晉書徐邈東莞姑幕人孝武帝招延儒學之士謝安
舉以應選補中書舍人撰正五經音訓學者宗之邈
中書侍郎太子前衛率安帝即位拜驍騎將軍所注
穀梁傳見重於時

陸德明曰邈字仙民

按徐氏於諸經皆有音顏氏家訓書證音辭
篇屢引之

范氏宣周易論難

佚

晉書范宣字宣子陳留人博綜衆書尤善三禮太尉
郗鑒命為主簿詔徵太學博士散騎郎並不就著禮
易論難皆行於世

李氏顯周易卦象數旨

七錄六卷

佚

晉書庾子顯郡舉孝廉亦有文義多所著作

隋志東晉樂安亭侯李顥撰

陸德明曰顥字長林江夏人東晉本郡太守

顧氏夷等周易難王輔嗣義

七錄一卷

佚

隋志晉揚州刺史顧夷等撰

李氏軌周易音

隋志一卷

佚

隋志東晉尚書郎李軌撰

陸德明曰軌字弘範江夏人東晉祠部郎中都亭侯

宋氏處宗通易論

唐志一卷

佚

李氏悅之易音

佚

晉書悅之字元禮陳郡陽夏人始為謝玄參軍後為
會稽王道子所親愛每勸道子專攬朝權俄而見誅
冊府元龜悅之注繫辭又為易音

沈氏

熊

周易譜

唐志一卷

佚

周易雜音

唐志三卷

佚

范氏長生周易注

隋志

才作蜀

十卷

舊唐志同

佚

顏之推曰易有蜀才注江南學士遂不知是何人王儉四部目錄不言姓名題云王弼後人謝旻夏侯該並讀數千卷書皆疑是譙周而李蜀書一名漢之書

云姓范名長生自稱蜀才而方以晉渡江後北間傳
記皆名為偽書不貴省讀故不見也

十六國春秋西山范長生巖居穴處李雄歡迎立為君
而臣之長生固辭曰推步大元五行大會甲子祚鍾于
李非吾節也雄即成都王位長生乘素輿詣成都即拜
丞相尊曰范賢長生善天文有術數民奉之如神

華陽國志李雄克成都迎范賢為丞相尊為天地太
師封西山侯賢名長生一名延久又名九重一曰交

字元涪陵丹興人

按釋文引蜀才注大車以載作大輿官有渝
官作館君子以明庶政明作命大耋作啞羸
其角羸作累箕子之明夷箕作其二簋作軌
懲忿窒欲懲作澄壯于頄作仇覓陸夬夬陸
作睦繫于金柅作尼孚乃利用禴作躍在天
成象成作盛知崇禮卑禮作體研幾作孳幾
參天兩地而倚數作奇數

經義考卷十一

欽定四庫全書

經義考卷十二

翰林院檢討朱彝尊撰

易十一

宋明帝集羣臣講易義疏

隋志十九卷

七錄唐志
二十卷

佚

國子講易議

七錄六卷

佚

宋書帝好讀書愛文義在藩時撰江左以來文章志又續
衛瓘所著論語二卷行於世及即位才學之士多引進參
侍文籍應對左右於華林園芳堂講周易常自臨聽

張氏該等羣臣講易疏

隋志周易義疏宋明帝集羣臣講

唐志二十卷

佚

荀氏柔之易音

佚

陸德明曰頴川頴陰人宋奉朝請

冊府元龜荀柔之注周易繫辭并為易音

按釋文議之而後動荀本作儀之

雷氏次宗周易注

佚

豫章古今記雷次宗字仲倫入廬山事沙門惠遠篤志好學屢徵不起注禮記周易

何氏謹之周易疑通

七錄五卷

佚

阮孝緒曰宋中散大夫何謹之撰

張氏浩周易占

隋志一卷

佚

按南史張暢子浩官至義陽王昶征北諮議
叅軍融之兄也

徐氏爰易音

佚

陸德明曰爰字季玉琅琊人

竇蒙曰爰字長玉本名瑗避傅亮諱除玉字大中
大
夫

范氏散周易義

隋志一卷

佚

隋志宋陳令范散撰

齊國學周易講疏

七錄二十六卷

佚

阮孝緒曰齊永明中國學講

祖氏冲之易義

佚

南齊書冲之字文遠范陽薊人少稽古有機思宋元
嘉中用何承天所制厯比古十一家為密冲之以為
尚疎乃更造新法孝武令朝士善厯者難之不能屈
出為婁縣令謁者僕射永明中轉長水校尉著易老
莊義釋論語孝經注九章造綴述數十篇

顧氏歡注王弼易

佚

南齊書歡字景怡吳郡鹽官人篤志好學躬耕誦書
夜則然糠自照母亡廬於墓次遂隱遁不仕於剡天
台山開館聚徒受業者常近百人太祖輔政徵為揚
州主簿及踐阼乃至稱山谷臣請退東歸上賜麈尾
素琴永明元年詔徵為太學博士不就卒於剡山歡
注王弼易二繫學者傳之

沈氏驥士易經要畧

佚

南齊書麟士字雲禎吳興武康人少好學家貧織簾
讀書口手不息隱居餘干吳差山講經教授從學者
數十百人各營屋宇依止其側昇明末詔徵為奉朝
請永明六年徵為太學博士建武二年徵著作郎永
元二年徵太子舍人並不就著周易兩繫莊子內篇
訓注易經禮記春秋尚書論語孝經喪服老子要畧
數十卷

徐氏伯珍周易問答

七錄一卷

佚

南齊書伯珍字文楚東陽太末人究尋經史遊學者
多依之太守王曇生張淹並加禮辟伯珍應召乃退
如此者凡十二焉吳郡顧歡摘出尚書滯義伯珍酬
答甚有條理永明二年刺史豫章王辟議曹從事不
就卒年八十四

周氏顓周易論

隋志十卷

七錄三十卷

佚

南史顓字彥倫顓七世孫元徽中為剡令齊高帝輔政為齊殿中郎建元初為文惠太子中軍錄事叅軍轉太子僕兼著作撰起居注遷中書郎轉國子博士梁武帝周易大義

隋志二十一卷

唐志二十卷

佚

大義疑問

唐志二十卷

佚

周易講疏

隋志三十五卷

佚

梁書高祖文思欽明能事畢寃少而篤學洞達儒玄

雖萬幾多務猶卷不輟手然燭側光常至戊夜造制
旨孝經義周易講疏及六十四卦二繫文言序卦等
義樂社義毛詩答問春秋答問尚書大義中庸講疏
孔子正言老子講疏凡二百餘卷並正先儒之迷開
古聖之旨王侯朝臣皆奉表質疑高祖皆為解釋大
同中於臺西立士林館領軍朱异太府卿賀琛舍人
孔子祛等遞相講述於是四方郡國趨學向風

簡文帝易林

十七卷

佚

南史帝博綜羣言善談玄理弘納文學之士賞接無倦嘗於玄圃述武帝所製五經講疏聽者傾朝野所著禮大義二十卷易林十七卷

諸非經義不錄

並行於世

元帝周易講疏

梁書十卷

佚

南史元帝性愛書籍既患目多不自執卷置讀書左右番次上直晝夜為常畧無休已雖倦卷猶不釋五人各伺一更恒致達曉常眠熟大軒左右有睡讀失次序或偷卷度紙帝必驚覺更令追讀著周易講疏十卷連山三十卷筮經十二卷

顏之推曰元帝在江荆間召置學生親為教授廢寢忘食以夜繼朝至於倦劇愁憤輒以講自解

連山

隋志三十卷

佚

段成式曰梁元帝易連山每卦引歸藏斗圖立成委
化集林及焦贛易林

洞林

隋志三卷

佚

元帝自序曰蓋聞玄枵之野鬼方難測朱鳥之舍神

道莫知而緹縵曉披既辨黃鍾之氣靈臺夕望便知
玉井之色復以談乎天者雖絕名言之外存乎我者
還居稱謂之中余幼學星文多歷歲稔海中之書畧
加尋究巫咸之說偏得研求雖紫微迢遞如觀掌握
青龍顯晦易乎窺覽羨門五將巫經玩習韓終六王
常所寶愛至如周王白雉之筮殷人飛燕之卜著名
聚雪非關地極之山卦有密雲能擁西郊之氣文通
七聖世經三古山陽王氏真解談玄河東郭生纔能

射覆兼而西之竊自許矣

策經

梁書十二卷

佚

南平王蕭偉

周易幾義

隋志一卷

佚

周易發義

唐志一卷

佚

梁書南平元襄王偉字文達太祖第八子也天監元年封建安郡王十七年改封南平郡王

蕭氏歸周易義記

佚

隋書歸字仁遠梁昭明太子統之孫也父詒周太祖以為梁主都江陵詒歸嗣在位二十年梁之臣子

謚曰孝明皇帝著孝經周易義記行於世

蕭氏子政周易義疏

隋志十四卷

佚

冊府元龜蕭子政為都官尚書撰周易義疏十四卷

繫辭義疏三卷

伏氏曼容周易注

七錄八卷

佚

周易集林

唐志十二卷

又一卷

佚

南史伏曼容字公儀平昌安丘人善老易常云何晏
疑易中九事以吾觀之晏了不學也為驃騎行叅軍
宋明帝好周易嘗集朝臣於清暑殿講詔曼容執經
曼容素美風采明帝恒以方嵇叔夜使吳人陸探微

畫叔夜像以賜之齊建元中仕為太子率更令與河
內司馬憲吳郡陸澄共撰喪服建武中拜中散大夫
曼容宅在瓦官寺東施高坐於廳事有賓客輒升高
坐為講說生徒常數十百人梁臺建召拜司徒司馬
出為臨海太守為周易毛詩喪服集解老莊論語義

陶氏 弘景 易髓

宋志三卷

佚

南史陶弘景字通明丹陽秣陵人齊高帝作相引為
諸王侍讀除奉朝請永明十年脫朝服挂神武門上
表辭祿詔許之止於句容之句曲山號華陽隱居時
人謂為山中宰相大同二年卒詔贈太中大夫謚貞
白先生

褚氏

仲都周易講疏

隋志十六卷

佚

南史仲都錢唐人善周易為當時之冠梁天監中歷位五經博士

按褚氏易錢唐全緩弘立受之正義每引其說其云雷資風而益遠風假雷而增威頗與子夏傳地得水而柔水得地而流辭義相近

何氏隋周易注

隋志十卷

佚

梁書胤字子季廬江潯人師事沛國劉瓛受易及禮
記毛詩起家齊秘書郎遷太子舍人出為建安太守
遷司徒主簿注易又解禮記於卷背書之謂為隱義
累遷左民尚書領驍騎中書令高祖踐阼詔為特進
右光祿大夫遣領軍司馬王果宣旨果至胤單衣鹿
巾執經卷下牀跪受詔書就席伏讀謂果曰吾年已
五十七月食四斗米不盡何容得有宦情果還以報
有敕給白衣尚書祿胤注周易十卷毛詩總集六卷

毛詩隱義六卷禮記隱義二十卷禮答問五十五卷
賀氏瑒周易講疏

佚

梁書賀瑒字德璉會稽山陰人天監初為太常丞四
年初開五館以瑒兼五經博士七年拜步兵校尉領
五經博士所著禮易老莊講疏朝廷博議數十篇

朱氏昇集注周易

七錄一百卷

佚

梁書朱异字彥和吳郡錢唐人遍治五經尤明禮易
明山賓表薦异高祖召見使說孝經周易義甚悅之
召直西署俄兼太學博士其年高祖自講孝經使异
執讀累遷右衛將軍時城西開士林館以延學士异
與左丞賀琛遞日述高祖禮記中庸義皇太子又召
异於玄圃講易改加侍中遷左衛將軍遷中領軍侯
景舉兵反以討异為名及寇至文武咸尤之异慙憤

發病卒所撰禮易講疏及儀注文集百餘篇亂中多
亡逸

孔氏子祛續朱昇集注周易

一百卷

佚

梁書孔子祛會稽山陰人通經術尤明古文尚書初
為長沙嗣王侍郎兼國子助教累遷散騎侍郎兼中
書通事舍人尋遷步兵校尉高祖撰五經講疏及孔

子正言專使子祛簡閱羣書以為義證事竟敕子祛
與右衛朱昇左丞賀琛於士林館遞日執經累遷通
直正員郎舍人如故著尚書義二十卷集注尚書三
十卷續朱昇集注周易一百卷續何承天集禮論一
百五十卷

庾氏註易林

二十卷

佚

南史庾詵字彥寶新野人梁武帝少與詵善及起兵
署為平西府記室叅軍詵不屈普通中詔以為黃門
侍郎稱疾不起卒謚貞節處士撰易林二十卷

費氏

元珪周易注

七錄九卷

佚

隋書梁有齊安叅軍費元珪著周易

陸德明曰蜀人

尹氏濤周易注

七錄六卷

佚

陸德明曰不詳何人

姚氏規周易注

隋志七卷

佚

崔氏覲周易注

隋志十三卷

佚

周易統例

隋志十卷

佚

馬氏楷周易文

七錄一卷

佚

沈氏林周易義

七錄三卷

佚

武氏靖周易雜占

七錄八卷

佚

梁氏蕃周易開題義

唐志作開
題論序疏

隋志十卷

佚

周易文句義疏

唐志二十卷

佚

周易釋序義

唐志三卷

佚

周氏

弘正周易義疏

隋志十六卷

佚

陳書周弘正字思行汝南安城人起家梁太學博士
累遷國子博士時於城西立士林館弘正居以講授聽者
傾朝野焉弘正啟梁武帝周易疑義五十條又請釋乾坤
二繫詔答曰知與張譏等三百一十二人釋乾坤文及二
繫萬幾小暇試當討論大建五年授尚書右僕射卒於官
謚曰簡子所著周易講疏十六卷論語疏十一卷孝經疏

二卷顏之推曰梁世老莊周易總謂三玄武宣簡文躬自講論周弘正奉贊大猷化行郡邑學徒千餘實為盛美

張氏譏周易義

或作講疏

隋志三十卷

佚

南史張譏字直言清河武城人受學於汝南周弘正梁武帝嘗於文德殿釋乾坤文言譏與陳郡袁憲等與焉敕令論議諸儒莫敢先出譏乃整容而進詔審

循環辭令溫雅帝異之賜袞襦絹云表卿稽古之力
為士林館學士簡文發孝經題譏論議往復甚見嗟
賞陳天嘉中為國子助教後主嗣位為國子博士東
學宮士陳亡入隋終於長安所撰周易義三十卷尚
書義十五卷毛詩義二十卷孝經義八卷論語義二
十卷後主嘗敕就其家寫入秘閣

魯氏弘度易林

隋志三卷

佚

經義考卷十二